

Minister Plenipotenciario, Edwin Abath

Nos no mag di lubida Boy Ecury y record'e kico el a haci pa Reino Hulandes



DEN HAAG - Na teatro "De Balie" na Amsterdam a tuma lugar un anochi di conmemoracion di e heroe Arubiano Boy Ecury.

E anochi a keda organisa pa Gabinete di Minister Plenipotenciario di Aruba en cooperacion cu e organisacion "Antilliaans Netwerk". Un publico grandi a asisti n'e encuentro aki, entre nan Minister Plenipotenciario di Curaçao sr. Seldry Osepa, miembro di Raad van State sr. mr. ing. Hubert Maduro y familiarnan di Boy Ecury.

Presidente de Antilliaanse Netwerk, sra. Maite de Haseth, den su introduccion a expresa su satisfaccion di por a organisa un encuentro asina den cooperacion cu Cas di Aruba.

"E forma aki di cooperacion ta hustamente loke e organisacion ta boga pe".

Minister Plenipotenciario di Aruba sr. Edwin Abath a cuminsa su discurso referiendo n'e siman di 4 y 5 di mei, unda ta para keto na Segunda Guerra Mundial, e cantidad di victimanan cu a perde nan bida y alabes e liberacion (Bevrijdingsdag) cual a re-establece Paz y Derecho.

'Esaki ta un momento husto p'e comunidad Antiano y Arubano para keto n'e consecuencianan di e guerra aki, cu aunke el'a tuma lugar den e parti Europeo di Reino, e islanan den Caribe sea directo of indirecto tambe a word'e afecta.

Ta dificil y casi imposibel pa papia di guerra si bo mes no a experencia esaki. Pero si considera cu guerra ta para pa inhusticia y ausencia libertad, anto e ta bira mas tan-

gibel. Esaki ta nifica cu e ser humano ta keda priva di e derechonan elemental di bida.

Pesey ta importante pa awendia para keto n'e hecho cu Libertad y Husticia no ta derechonan dimes, sino ambos ta elementonan necesario den nos bida diario, pa cual nos ta carga un responsabilidad comparti. Elementonan esencial den nos bida cualnan nos mester aprecia y proteha, asina e mandatario a bisa.

Sr. Edwin Abath a relata e sentimento cu tabata reina durante tempo di guerra bou di e habitantenan den Caribe pa cu e situacion na Hulanda. E preocupacion pa di con e ocupacion di Hulanda dor di un otro pais lo afecta nos. Sinembargo e situacion di impotencia mesora a keda traduci den diferente accion pa brinda ayudo na Hulanda, p.e. colecta fondonan pa suministracion di arma den e prome añanan di ocupacion Aleman.

E refinerianan na Aruba y Curaçao a hunga un rol importante tambe den suministra combustible p'e forzanan aereo di e aliadonan. Mientras cu Hulanda tabata ocupa p'e regimen Nazi e opresion contra Hudieunan tabata aumentando; un gran cantidad di ciudadano Hulandes a keda traslada pa campamentonan di trabao pa traha p'e industria di guerra Aleman. Tur esaki a tuma lugar bou circunstancianan inhumano.

'Den e periodo aki e hoben Arubiano Boy Ecury tabata na Hulanda. Ningun hende lo a tume na malo, si el a dicidi pa bandona Hulanda y regresa su isla Aruba, na comienso di Segunda Guerra Mundial. Un hoben cu tabatin un

futuro briyante su dilanti na Aruba – sinembargo e no a duda ningun momento y a dicidi pa afilia su mes cu e resistencia (het verzet) Hulandes. E tabata dispuesto pa sacrifica su bida pa Hulanda, cu no tabata ni su patria, pero madre patria.

Boy Ecury tabata orguyoso di ta Arubiano, pero na mesun instante e tabata sinti su mes ciudadano di Reino Hulandes y a scoge - sin duda - pa yuda su compatriotanan di Reino atraves di resistencia.

Pesey lo ta bon si e generacion hoben - na Aruba y como na Hulanda - sera mihor conoci cu Boy Ecury y cuminsa pensa kico Reino ta nifica pa nos.

Den esaki ta necesario pa enfoca riba kico ta uni nos, enbes di kico ta separa nos for di otro.

Pa Boy Ecury esaki tabata algo di mes; e tabata un ciudadano di Reino ehemplar - "un role-model". Y te ainda e ta, asina sr. Edwin Abath a bisa.

E mandatario a termina su discurso mustrandu riba e balornan cu ta uni nos: Husticia, Igualdad, Libertad y Tolerancia.

'E hoben Arubiano Boy Ecury, den su tempo, a muestra cu e comunidad Arubiano y Antiano a biba y a contribui n'e proceso pa liberacion di Hulanda y asina a impone democracia y estado di derecho.

Pues nos mester recorda cu mantencion di libertad y un estado di derecho no ta algo di Gobierno o organisacionnan, sino algo di nos tur. E ta di e hende pa humanidad, segun e palabranan di Edwin Abath.